



## POLITIVEDTEKT FOR VANYLVEN KOMMUNE

### ***Kapittel I – Allmenne føresegner***

#### **§ 1 Offentleg stad**

Med offentlig stad er i denne vedtekta meinte gate, veg, her medrekna fortau, sti, park, torg e.l., plass, bru, bryggje, kai, strand, anlegg eller annan stad der det er allmenn ferdsle eller som er bestemt for allmenn ferdsle.

#### **§ 2 Festar, brukar, leigar eller styrar av hus eller grunn**

Dei plikter som er lagde på eigar av hus eller grunn, kviler også på den som festar, brukar, leiger eller styrer hus eller grunn.

### ***Kapittel II - Orden på offentlig stad***

#### **§ 3 Ro og orden på offentlig stad**

På eller like attmed offentlig stad må ingen vere med i oppstyr, samanstimling, larm eller bråk som skiplar den allmenne orden eller ferdsel.

Når mange mennesker samlar seg nær inngang til forsamlingslokale, sports plass, utsalsstad, stoppestad e.l., skal dei stå i kø og elles rette seg etter dei pålegg som politiet eller arrangøren gjev for å halde oppe den allmenne orden eller for å regulere ferdsla.

#### **§ 4 Song og musikk, reklame m.m.**

Den som på eller ut mot offentlig stad vil føre fram song eller musikk, skipa til framsyning eller gjere bruk av høgtalar, må på førehand gje melding til politiet.

Det same gjeld den som på eller nær offentlig stad ynskjer å dele ut eller spreie opprop, lysingar, reklame e.l., eller bruke gåande, køyrande eller flygande reklame.

## **§ 5 Farleg eller skremande verksemd**

På, ut over eller like attmed offentlig stad er det forbode:

1. Å skyte med gevær eller anna skytevåpem eller med boge, sprettert e.l.
2. Å brenne av krutt, fyrverkeri eller sprengstoff utan at politiet har gjeve løyve.
3. Å kaste eller sleppe stein, snøball eller anna som kan vere til skade eller ulempe for dei som ferdast der.

## **Kapittel III Sikring av ferdsla**

### **§ 6 Hindringar**

På eller ut over offentlig stad er det forbode å setje eller hengje noko som kan vere til hinder eller ulempe for ferdsla.

Markiser skal vere festa så høgt at underkanten minst er 2,50 m over bakken.

### **§ 7 Sport, leik**

Politiet kan sette forbod mot aking og andre former for sport, leik eller spel på bestemt offentlig stad der dette er påkravd av omsyn til ferdsla eller den almenne orden.

### **§ 8 Sperring av fortau m.v.**

Krev byggjearbeid e.l. at gate, veg eller annan offentlig stad vert heilt eller delvis sperra for ei avgrensa tid, lyt ein på førehand søkje løyve frå politiet. Politiet kan setje nærare vilkår for løyvet.

### **§ 9 Sprengingsarbeid**

Sprenging på eller like attmed offentlig stad skal meldast til politiet på førehand. Politiet kan krevje særlege tryggingstiltak.

**§10 Diverse arbeid**

Reising, riving eller reparasjon av bygning, graving eller anna arbeid på ut eller mot offentleg stad der det kan bli fare for ferdsle, skal på førehand meldast til politiet. Politiet kan fastsette korleis arbeidsstaden skal sperrast og krevje andre tryggingstiltak til vern for publikum.

**§ 11 Vedlikhald av bygning m.v.**

Ved vedlikhald av bygningar m.v. på eller ut mot offentleg stad pliktar den ansvarlege for arbeidet å setje opp avvisarar som gjer det tydeleg at det er farleg eller til ulempe å ferdast der.

**§12 Avvisarar**

Når det er fare for at snø eller is kan falle ned frå hustak mot offentleg stad, skal eigaren straks sette opp avvisarar som gjer det tydeleg at det er farleg å ferdast der, og snarast syte for at taket blir rydda.

**§ 13 Fjerning av sperrer**

Sperringar, avvisarar, stigar e.l. må takast bort når arbeid som nemnt i §§9, 10 og 11 er gjort eller når faren som er nemnt i § 12 ikkje lenger er til stades.

**§ 14 Ferdsle på frosne vatn eller frosen sjø**

Politiet kan av tryggingssgrunnar sette forbod mot, eller gje reguleringande føresegner for ferdsle på vatn som er frosne eller sjø som er frosen.

***Kapittel IV Reinhold på offentleg stad*****§15 Fortau m.v.**

Eigar av hus eller grunn mot offentleg stad pliktar å gjere reine lys- og luftegraver som er knytta til eigedomen.

Reinholdet skal gjerast slik at det vert til minst mogleg ulempe.

Oppsop e.l. må ikkje leggjast i kloakksluk.

### **§ 16 Takras**

Eigar av hus eller grunn mot offentleg stad pliktar å rydde fortauet utanfor eigedomen for snø og is etter takras.

### **§ 17 Avløp for vatn**

Eigar av hus eller grunn mot offentleg stad skal sørge for at avløp for vatn i fortau, rennestein, grøft e.l. vert halde ope.

## ***Kapittel V Hindre tilgrising***

### **§ 18 Hindre tilgrising o.l.**

På, ut over eller like attmed offentleg stad er det forbode:

1. Å kaste glas, flasker, spiker, papir, fruktskal eller anna avfall,
2. Å grise til med måling, tusj, sprayprodukt e.l. på noko overflate mot offentleg stad, under dette på eller ved bygning, gate, veg, park, anlegg, innretningar og framkomstmiddel.
3. Å hengje opp kunngjeringar, plakatar, e.l. utan at politiet har tillete dette.
4. Å urinere

Dette gjeld likevel ikkje oppslag på tavler e.l. som kommunen har godkjent til slik bruk, eller oppslag på eigedom om tilhøve som berre høyrer eigedomen til eller næringsverksemda til dei som bur der.

Det er forbode å rive, skade eller skjemme oppslag som er lovleg sett opp.

Oppslag skal fjernast når dei er forelda.

### **§ 19 Avfall**

Den som driv med sal frå portrom, kiosk e.l., eller som driv anna liknande næringsverksemd på eller ut mot offentleg stad, skal syte for at området ikkje vert skjemt eller skitna til av verksemda, og pliktar å syte for at det blir sett opp mange nok korgar for papir og avfall.

Den som arrangerer tilstelning på offentlig stad, skal syte for at papir og anna avfall blir fjerna etter arrangementet.

## ***Kapittel VI Offentlege anlegg***

### **§ 20 Kyrkjegard**

På kyrkjegard er det forbode å sykle, ake eller å drive sport, leik eller anna som ikkje sømer seg der. Det er forbode å trengje seg inn på kyrkjegard når den er stengd for besøk.

Lause hundar må ikkje sleppast inn eller takast med på kyrkjegard.

## ***Kapittel VII Dyr***

### **§ 21 Husdyr m.m.**

Det er forbode å la hest, storfe, sau, gris eller geit gå laus på eller ved offentlig stad utanfor tradisjonelle beiteområde utan forsvarleg tilsyn. Fjørfe må ikkje sleppast ut på offentlig stad. Sirkusdyr eller ville dyr må ikkje førast på offentlig stad utan løyve frå politiet.

### **§ 22 Farlege hundar**

Politiet kan fastsette at hund som kan plage menneske eller dyr på offentlig stad, skal haldast i band eller ha munnkorg.

Det same gjeld hundar som politiet finn farlege på grunn av storleik eller rase.

### **§ 23 Bandtvang mm**

1. På offentlig stad er det forbode å la hund gå laus.
2. Hund skal vere utstyr med halsband med namn, adresse og telefonnummer til eigaren eller den som har ansvaret for hunden, eller vere lovleg merka på annan måte.

3. Eigar eller den som har ansvar for hund pliktar straks å fjerne ekskrement som hunden let etter seg i tettbygd område.

### **§ 26 Sal, avliving o.a.**

Politiet kan ta hand om hund som går laus i strid med føresegnene ovanfor. Let den som eig eller har hunden vere å hente hunden innan ei veke etter at han eller ho er varsla personleg eller ved lysing i pressa, kan politiet selje eller avlive hunden.

## ***Kapittel VIII Arrangement på offentlig stad m.v.***

### **§ 27 Søknadsplikt for arrangement på offentlig stad**

Den som på offentlig stad vil lage til arrangement som i hovudsak er av underhaldande, kunstnerisk, selskapeleg eller kommersielt slag, som har ein storleik som opplagt vil føre til behov for omfattande reguleringar av ferdsla eller vakthald, må søkje om dette innan ein frist som politiet set. Politilova § 11 gjeld tilsvarande.

### **§ 28 Meldeplikt for allement tilgjengelege arrangement utanfor offentlig stad m.m.**

Den som vil lage til eit arrangement som er allment tilgjengeleg, må senda melding i god tid til politiet. Dette skal gjerast sjølv om arrangementet ikkje går føre seg på offentlig stad, når det er truleg at det vert naudsynt med polititilsyn for å sikre ro og orden eller avvikling av trafikken på grunn av storleiken på eller karakteren av arrangementet. Plikt til å melde frå gjeld òg samkome med dans eller anna tilstelning som i hovudsak er av selskapeleg eller underhaldande art for medlemmer av ei foreining eller liknande samanslutning. Politilova § 11 gjeld tilsvarande.

## ***Kapittel IX Born***

### **§ 29 Offentleg dans e.l.**

Born under 15 år har ikkje tilgjenge til offentleg dans eller liknande allment tilgjengeleg tilstelning utan at dei er saman med foreldre eller andre føresette.

## ***Kapittel X Ymse føresegner***

### **§ 29 Forsøming av plikt**

Forsømer nokon å utføre det vedkomande har plikt til etter vedtektene eller etter pålegg gjeve med heimel i vedtektene, kan politiet på vegne av vedkomande setje dette i verk. Den som har forsømt pliktene må dekkje utgiftene.

### **§ 30 Straff**

Brot på vedtekta eller pålegg gjeve i medhald av vedtekta, vert straffa etter politilova § 30 nr. 4, om ikkje tilhøvet kjem inn under strengare straffepåbod.

### **§ 31 Iverksetjing**

Denne vedtekta tek til å gjelde 1 månad etter at ho er stadfest av Justis- og politidepartementet. Politivedtekta for Vanylven kommune, stadfesta 10. september 1997 fell bort frå same tid.

Vedtatt av Vanylven kommunestyre 30.01.06 sak 5/2006, arkivsak 04/00127